

摘藻堂四庫全書薈要

集部

欽定四庫全書薈要

集部

山谷集卷三

詳校官助教臣常循

欽定四庫全書薈要

山谷集

提要

臣等謹案山谷內集三十卷別集二十卷外

集十四卷詞一卷年譜三十卷附伐檀集二

卷宋黃庭堅撰庭堅事迹具宋史本傳其集

舊有數本有曰內集又曰正集庭堅之甥洪

炎所編即庭堅手定之內篇所謂退聽堂本

者也曰外集李彤所編所謂丘濬藏本者也
曰別集庭堅諸孫黃芻所謂內閣中鈔宋蜀
人所獻本者也內集編于建炎二年別集編
于淳熙九年黃芻年譜則編于慶元五年蓋
外集繼內集而編別集繼內外兩集而編年
譜繼別集而編獨李彤之編外集未著年月
然考外集第十四卷送鄧慎思歸長沙詩慎
字空格注云今上御名是外集亦編于孝宗

時在別集之前則刻全集者亦當置外集於別集之前也三集皆合詩文同編後人注釋則惟取其詩任淵所注之內集即洪炎所編之內集史容所注之外集則與李彤所編次第已多有不同而李彤編外集之大意猶稍見於史注第一卷溪上吟題下惟史季溫注之別集則與黃芻所編別集大有掎拄此則原本與注本不可相無者矣又外集第十一

卷以下四卷詩凡四百有奇皆庭堅晚年刪去而李彤附載入者此則任史三注本皆未之有庭堅之詩得此而後全又其中有與年譜相應者黃芻編年譜時皆一一分注某年某事之次而今但据三集檢其目則年譜有而本集無故此四卷尤不可廢者也黃芻之譜專為考證詩文集而作故刻全集必當兼刻年譜而近日刻本則或刪節年譜或刪併

卷次或移易分類以就各體或專刻一集而
不及其全此本刻于明嘉靖中尚不失宋本
之遺意非外間他刻所及末附代檀集二卷
則庭堅父庶之作庶字亞父慶歷二年進士
歷州郡從事攝康州其詩亦清脫不凡併刻
之者欲明家學源流耳乾隆四十一年十一
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬五千一百二十二

集部

山谷集卷一

宋 黃庭堅 撰

賦十首

寄老庵賦

休亭賦

江西道院賦

蘇李畫枯木道士賦

東坡居士墨戲賦

別友賦

白山茶賦

對青竹賦

煎茶賦

苦笋賦



楚詞七首

龍眠操

濂溪詩

王聖涂二亭歌

木之彬彬

予欲金玉汝

明月篇

悲秋

賦十首

寄老庵賦

為孫莘老作

生乎今茲兮見曩之人萬物一家兮卷宇宙而無鄰索

橡可以為澤兮鬢鬚蒼然獨奈何俯仰以是兮吾獨立
而不陳新彼庖族之技養兮伐大觚以嘗巧風悲郢人
之宰木兮顧無所用吾斤濔濔汗汗兮黃川日夜流吾
誰踈親兮行天下以虛舟無地以受人之徽纆故超世
而不避世槃礴於蝸牛之宮經行於羊豕之隧輶甍社
以為樽兮舉海門以為觥觴豆於無味之味從衲子以
卒歲儻然以寓其不得已是謂無累之累何用窮山幽
谷為獨安往而非寄寄吾老於簪紱爰高位之疾顛春

秋以旅力去矣奉腴祿而彫年寄吾老於孫息厭羣雛
之磬磬眷火宅之無安寧執枯而俱焦寄吾老於友朋
未沫平生之言人壽不能金石忽相望於鬼伯之阡伊
漢上之龐禪空諸有以為宅沈貨泉以棄責聊生涯於
緯竹維衡岳之懶叟獨金玉其言音踞燒木以燠寒投
鼻涕而無寸陰相彼宛童寓於柏松自于青雲束縛舍
翁主人不承澤螻蟻為宮薪者斧焉賓主禍同無意以
為智維此意而天天申申從人以嬉寡婦之次高明之

糠相與社而稷之訖無累於去來養生者諱盈術竅者
天門不開此其是耶非乎窮於外者反於家困乎智者
歸愚伊未嘗一用其智對萬世而德不孤若人者其在
斯乎託軒冕而鶉居無德色之可鋤殆其肆志於江湖
翁乎強為我著書無促駕青牛之車

休亭賦

井序

吾友蕭公餉濟父往有聲塲屋間數不利於有司歸教
子弟以宦學而老於清江之上開田以為歲鑿池灌園

以為籩豆兒時藝木今憇其陰獨立無鄰自行其意築
亭高原以望玉笥諸山用其所以齋心服形者名之曰
休亭乞余言銘之將游居寢飯其下豫章黃庭堅為作
休亭賦曰

槃礴一軌萬物並馳西風木葉無有靜時懷蠹在心必
披其枝事時與黃澗同機世智與太行同巖飲羽於市
門之下血刃於風波之上至於行盡而不休夫如是奚
其不喪故曰衆人休乎得所欲士休乎成名君子休乎

命聖人休乎物莫之嬰吾友濟父居今而好古不與不
取亦莫予敢侮將強學以見聖人而休乎萬物之祖曩
游於世也獻璞玉而取刖圖封侯而得黥驕色未鉏而
物駭機心先見而鷗驚撫四方者僂矣迺歸休於此亭
濯纓於峽水之上游晞髮於舞雩之喬木彼玉筍之隱
君子惠我以生芻一束是謂不著而筮從無龜而吉卜

江西道院賦

并序

江西之俗士大夫多秀而文其細民險而健以終訟為

能由是玉石俱焚名曰珥筆之民雖有辯者不能自解
免也惟筠為州獨不囂於訟故筠州太守號為守江西
道院然與南康廬陵宜春三郡並蒙惡聲元祐八年武
陵柳侯子儀守筠之明年也樂其俗之媿使為政者不
勤乃新燕居之堂榜曰江西道院以鼓舞其國風且為
高安之父老雪恥焉秋九月遣使來告成於雙井永思
堂於是為之賦其詞曰

勾吳之區維斗所直半入於楚終蝕於越有泰伯虞仲

季子之風故處士有巖穴之雍容有屈原宋玉枚乘之筆
故文章有江山之秀發吳越之君多好勇故其民樂鬪而
輕死江漢之俗多機鬼故其民尊巫而淫祀雖郡異而縣
不同其大畧不外是矣若乃高安之城豫章之別雖風氣
之未遠亦媿俗之可悅故柳侯下車解牛而不割未嘗發
矧初不折缺則喟然嘆曰江西道院名不虛生爰作新堂
合陳鼓笙有斐翰墨賓贊令丞作為詩歌接民頌聲昔也
憂民之憂今則樂民之樂懷僊伯之蛻蟬有勿翦之喬木

製劍池之菡萏以為裳釀丹井之清泠以為酌醉而起舞
父老持足恐使君之僊去而鰥寡之長失職也吾聞風行
於上而水波此天下之至文仁形於心而民服此天下之
善化豈可多為令而病民慢自設險而病民詐耶九轉
丹砂鑄鐵成金兩漢循吏鑄頑成仁我簡靜則民肅我
平易則民親今使高安之農養生於桁楊之外珥筆教
訟者傳問孝之章務耳鎖亢者深春耕之耒賣私鬬之
刀劍以為牛羞淫祀之樽俎以養親雖承平百年雨露

滲漉非二千石所以牧人者乎雖然有一於此堂密有
美樅而未聞處士之節岑蔚有於菟而不見墨客之文
豈其龜藏而自畀蠖屈而不伸者耶公試酌樽中之渌
謝山川之神為予問之

蘇李畫枯木道士賦

東坡先生佩玉而心若槁木立朝而意在東山其商略
終古蓋流俗不得而言其於文事補袞則華蟲黼黻醫
國則盧扁和秦虎豹之有美不彫而常自然至於恢詭

謫恠滑稽於秋兔之穎尤以酒而能神故其觴次滴瀝
醉餘顰申取諸造物之鑪錘盡用文章之斧斤寒煙淡
墨權竒輪囷挾風霜而不栗聽萬物之皆春龍眠有隱
君子見之曰商宇宙者朝徹於一指計褚中者心醉於
九九言其不同識也截鵬背而不帶芥烹鼠肝而腹果
然言其不同量也彼以睢睢盱盱我以蹢蹢涼涼則懼
夫子之獨立而矢來無鄉乃作女蘿施于木末婆娑成
陰與世宴息於其槃根作黃冠師納息於踵若新沐而

晞促阮咸以赴節按萬籟之同歸昔阮仲容深識清濁
酒沈於陸無一物可欲右琴瑟而左琵琶陶冶此族不
溷不濁是謂竹林之曲彼道人者養蒼竹之節以玩四
時鳴槁梧之風以召衆竅其鼻間栩栩然蓋必有不可
傳之妙若予也寄櫟社以神其拙顧白鷗之樂人深一
行作吏此事便廢懷稻粱以飴老就簪紱而成禽莊生
曰去國期年見似之者而喜矣况予塵土之渴心

東坡居士墨戲賦

東坡居士游戲於管城子楮先生之間作枯槎壽木叢
篠斷山筆力跌宕於風煙無人之境蓋道人之所易而
畫工之所難如印印泥霜枝風葉先成於曾次者歟顰
申奮迅六反震動草書三昧之苗裔者歟金石之友質
已死而心在斲泥郢人之鼻運斤成風之手者歟夫惟
天才逸羣心法無軌筆與心機釋冰為水立之南榮視
其胸中無有畦畛八窓玲瓏者也吾聞斯人深入理窟
積研囊筆枯禪縛律恐此物輩不可復得公其緹衣十

襲拂除蛛塵明窓棐几如見其人

別友賦送李次翁

曩聞義於孫李指尊選以見招惜予行之舒舒曰其夜
以為朝予望道於垓垣見萬物之富有恨逸駕之絕塵
又驂予以四牡喟後車之無策其四方乎索友仰雲飛
而注弋俯淵靚之沈鈎或一能之勝予忘日月之不予
謀或登吞舟之鱗或下垂天之翼手予弓而不釋恐斯
道之或息維廬江之四李三隱約於龍眠維若人之仕

蚤懷明月而麗川歲庚午而會梁語聞道之大用吸江
漢以為深累丘嶽以自重尾擊之而首應西犯之而東
抗棄旗鼓而不逐儼其陳之堂堂偉道學之崇崛增懦
夫之激昂觀出日於東方雖食焉而不吝無肯綮以自
試居自喜於餘刃彼覆却於萬方期斯言之猶信水渾渾
而進舟風剡剡而侵裘恐事親之不勸則惟是之同憂

白山茶賦

并序

姨母文城君作白山茶賦興寄高遠蓋以自況類楚人

之橘頌感之作後白山茶賦

孔子曰歲寒然後知松柏之後彫也麗紫妖紅爭春而
取寵然後知白山茶之韻勝也此木產於臨川之崔嵬
是為麻源第三谷仙聖所廬金堂瓊榭故是花也稟金
天之正氣非木果之匹亞迺得骨於崑閬非乞靈於施
夏造物之手執丹青而無所用析薪之斤雖睥睨而幸
見赦高潔皓白清脩閒暇徘徊冰雪之晨偃蹇霜月之
夜彼細腰之子孫與莊生之物化方坏戶以思溫故無

得而陵跨蓋將與日月爭光何苦與洛陽爭價惟是當時而見尊顯處於瑤臺玉墀之上是以閉藏而無悶淡然於乾楓枯柳之下江北則上徐庾江南則數鮑謝蓋不能刻畫嫦娥藩飾姑射諒無地以寄言故莫傳於膾炙況乎見素抱朴難乎郢人故徐熙趙昌舐筆和鈿而不敢畫或謂山丹之皓質足以爭長而更霸知我如此不幾乎罵雖瓊華明后土之祠白蓮秀遠公之社皆聲名藉甚俗態不捨挾脂粉之氣而蘊蘭麝與君周旋其

避三舍

對青竹賦 并序

余楚產也閱東南之竹多矣未嘗聞對青竹者也嘉州僧從之包封見貽藝之而成乃初識之惟範圍之內有知之物一無窮無知之物一無窮一耳一目不能遍覽也況六合之外者乎感而賦之

竹之美於東南以節不以文也其在楚之西鬱鬱葱葱連山繚雲也會稽之奇材任矢石蘄春之澤夏簞簫笛

沅湘淚血叩峽高節慈竹相守孝竹冬茁慈姥嶰谷笙
竽芭篁長石之山一節可航猶未極其瑰恠不常也故

吳楚無竹工非無竹工婦能織緝之器兒能雞鶩之籠
也今夫筥筐蠃筭榱樅翰藩巴船百丈下漢為筥貴之
則律呂汗簡賤之則箕帚蒸薪唯所逢遭盡於斧斤美
哉斯竹黃質墨章如出杼軸織文自當解甲稅枯金碧
其相歲寒在躬又免斲烹彼其文章之種性不可致詰
剗心而求之不可得劓根而求之不可得匪人匪天有

物有則惟其與蓬蒿共盡而無憾余亦不知白駒之過隙

煎茶賦

洶洶乎如澗松之發清吹皓皓乎如春空之行白雲賓主欲眠而同味水茗相投而不渾苦口利病解膠滌昏未嘗一日不放著而策茗枕之勲者也余嘗為嗣直淪茗因錄其滌煩破睡之功為之甲乙建溪如割雙井如虛日鑄如斲其餘苦則辛螫甘則底滯嘔酸寒胃令人

失睡亦未足與議或曰無甚高論敢問其次涪翁曰味
江之羅山嚴道之蒙頂黔陽之都濡高株瀘川之納溪
梅嶺夷陵之壓軌臨邛之火井不得已而去於三則六
者亦可以酌兔褐之甌淪魚眼之鼎者也或者又曰寒
中瘠氣莫甚於茶或濟之鹽勾賊破家滑竅走水又况
雞蘇之與胡麻涪翁於是酌岐雷之醪醴參伊聖之湯
液斲附子如博投以熬葛僂之聖去藪而用鹽去橘而
用薑不奪茗味而佐以草石之良所以固太倉而堅作

強於是有胡桃松實菴摩鴨脚勃賀薜蘿水蘇甘菊既
加臭味亦厚賓客前四後四各用其一少則美多則惡
揮其精神又益於咀嚼蓋大匠無可棄之材太平非一
士之畧厥初貪味雋永速化湯餅乃至中夜不眠耿耿
既作溫齊殊可屢歎如以六經濟三尺法雖有除治與
人安樂賓至則煎去則就榻不游軒后之華胥則化莊
周之蝴蝶

苦笋賦

楚道苦笋冠冕兩川甘脆愜當小苦而反成味溫潤鎮
密多啖而不疾人蓋苦而有味如忠諫之可活國多而
不害如舉士而皆得賢是其鍾江山之秀氣故能深雨
露而避風煙食有以之開道酒客為之流涎彼桂斑之
夢永又安得與之同年蜀人曰苦笋不可食食之動痼
疾令人萎而瘠予亦未嘗與之言蓋上士不談而喻中
士進則若信退若眩焉下士信耳而不信目其頑不可
鑄李太白曰但得醉中趣勿為醒者傳

楚詞七首

龍眠操三章贈李元中

吾其行乎道渺渺兮驂弱石巖巖兮川橫日月兮在上
風吹雨兮晝冥吾其止乎曲者如几直者如矢我為直
兮棘余趾我為曲兮不如其已吾耕石田兮為芝乃三
歲兮報我饑嗣茲穡兮則以稼從子于耜兮龍眠之下
螳臂美兮當車蟬螫強兮鬪虎我觀兮上下四方或錫
予兮以大武金石兮水波松柏兮雨霜有時女兮懷春

我欲筮兮同牀筮告予以不好予與居兮甚斌秦人同
炙兮徒欺予予和羹兮衆吐之南山霧兮楚氛其在茲
兮斗日月揚湯兮掬暘從子休兮龍眠之樾

朝百牢兮九飯藜羹不糝兮共樂而笑狐白裘兮豹祛
緼袍無裏兮亦見春予何喜兮安樂此曰有嘉人兮遺
予履發十襲兮示予與予武兮合度四畀兮隅立使離
朱兮詔之若人兮無鵠離朱茫然兮羿韋弓牧牛兮于
鼻牧羊兮不岐有若人兮可與歸因子問塗兮龍眠之

蹊

漁溪詩并序

春陵周茂叔人品甚高胸中灑落如光風霽月好讀書
雅意林壑初不為人窘束世故權輿仕籍不卑小官職
思其憂論法常欲與民決訟得情而不喜其為小吏在
江湖郡縣蓋十五年所至輒可傳任司理叅軍運使以
權利變其獄茂叔爭之不能得投告身欲去使者歛手
聽之趙公悅道號稱好賢人有惡茂叔者趙公以使者

臨之甚威茂叔處之超然其後廼寤曰周茂叔天下士也薦之於朝論之於士大夫終其身其為使者進退官吏得罪者自以不寃中歲乞身老於湓城有水發源於蓮花峯下潔清紺寒下合於湓江茂叔濯纓而樂之築屋於其上用其平生所安樂蠓水而成名曰濂溪與之游者曰溪名未足以對茂叔之美雖然茂叔短於取名而惠於求志薄於徼福而厚於得民菲於奉身而燕及甞棲陋於希世而尚友千古聞茂叔之餘風猶足以律

貪則此溪之水配茂叔以永久所得多矣茂叔諱惇實
避厚陵奉朝請名改惇頤二子壽肅皆好學承家求余
作濂溪詩思詠潛德茂叔雖仕宦三十年而平生之志
終在丘壑故余詩詞不及世故猶髣髴其音塵

溪毛秀兮水清可飯羹兮濯纓不漁民利兮又何有於
名絃琴兮觴酒寫溪聲兮延五老以為壽蟬蛻塵埃兮
玉雪自清聽潺湲兮鑒澄明激貪兮敦薄非青蘋白鷗
兮誰與同樂

津有舟兮蕩有蓮勝日兮與客就閒人聞欸音兮不知
何處散髮醉高荷為蓋兮倚芙蓉以當伎霜清水寒兮
舟著平沙八方同宇兮雲月為家懷連城兮珮明月魚
鳥親人兮野老同社而爭席白雲蒙頭兮與南山為伍
非夫人攘臂兮誰余敢侮

王聖涂二亭歌

并序

忠州太守王聖涂罷忠州春秋六十有六將告老於朝
而休於營丘以書抵黔州告其同年生黃魯直曰營丘

有叟將自此歸矣舍旁作二亭以休餘日子為我名且
歸以夸父老魯直名其一曰休休上言事下言德也其
一曰冥鴻言公自此去矰繳遠矣聖涂喜曰子盍為我
歌

營丘之下有宅有田梨棗兮觴豆耘耔兮為年鷄栖埒
兮羊豕在牧課兒子兮藝松菊炙背兮牆東夢覆舟兮
濤且風洋之回兮可以駕孫甥

一作男

扶輿兮父老同社

洋之水兮可以舟入鷗鳥兮與之游一世兮蜉蝣桑榆

兮愁可收從此休兮公誰黃髮之休偉長松兮卧龍蛇
閱千歲兮不改其柯震雷不驚兮誰欲休之以蜩蛭下
有錦石兮可用梧勺雲月供帳兮萬籟奏樂石子磊磊
兮澗谷縱橫春月桃李兮士女傾城時雨霖兮忽若海
潦收無事兮我以觀萬物之情兒時所藝兮桃李纖纖
隨世風波兮吹而北南昔去兮拱把今歸兮與天叅與
古人兮合契樹如此兮我何以堪鴻鴈磬兮或在洲渚
有心於粒兮弋者所取飛冥冥兮渺萬里而絕去藪澤

之羅者兮官子落羽

官一作觀

木之彬彬并序

曹公所禮三人孔融禰衡陽狂嫚侮操且疑且信故以
衡假手於黃祖融晚乃覆巢獨楊脩材慧數解隱語又
探其不言者發之最先得罪雖其父公雅故不足以貫
死嗟乎脩黃犢子有致遠材一怒其臂死於龍車之轍
曾不知隰子之伐木耶田常與大夫隰子登臺四望齊
邑南向而蔽於隰子之喬木成子不言隰子歸使人伐

木斧斤離數創則止之相室曰變之亟也曰田子將成
大事惡人知其微今不伐木未深忌也知人之所不言
其忌深矣故曰知微者兵在其頸求福者褚箴其穎雖
然隰子猶有所未立也與百里奚策虞公而去之豈可
同年語哉感二三子行事作木之彬彬

木之彬彬非取異於人可宮室則斬則伐可籩豆則撝
則擷草之茸茸非求顯於世中芻牧則刈則鉏中醫和
則剝則枯非以其材故耶是非之岐利害薰蒸嗟人道

之多患彼草木尚無情吾嘗觀於若人矣巧於辨人拙
於自辨好動乎天機不周乎時變罪莫慘於德有心禍
莫深於心有見罪不在德心其蝨賊禍不在心見其髡
箝之人也皦皦自鮮行於衆汚之前峽峽不讓立乎衆
埤之上積小不當是以亡其大當悲夫羿注矢以當物
十嘗中其七八引鎔鄒以自殘駭兕虎之竊發禍集於
所忽怨棲於榮名易其言則害智用其智則害明為君
子則奈何獨見曉於冥冥

予欲金玉汝贈黃從善

江山複重兮朋友失長處幽篁兮隔離天日鳥聲無人
兮我友來即久矣不聞德人之言兮為余發藥嘉若人
兮甚好脩蘭薰而時發兮水剛德而用柔有璞連城方
謨匠兮忍其與斗筭議之螫吾手而不砭兮舉百體而
弃之為民父母兮灼子之膚何能忍顧白日臨辰兮臣
何愛不與俱來古之人償責言兮雖九死其猶未悔虹
氣貫斗牛兮豈用俗人之町畦予愛蘭而莫與予佩兮

曰斯其不情帝關九牡兮照下土孔明子將觀東海兮
蛙說予以坎井盍嘗視吾寶兮茲有重於岑鼎子欲金
玉汝兮汝既金玉揭日月以適四方兮殆而按劍以為
戮鴈以不鳴烹木以才而斲天下皆羿兮矢來無鄉維
應以無名之樸

明月篇贈張文潛

天地具美兮生此明月陞白虹兮貫朝日工師告余曰
斯不可以為珮棄捐櫝中兮三歲不會霜露下兮百草

休抱此耿耿兮與日星遊
山中兮招招耕而食兮無
卹榛艾蓁蓁前吾牛兮
疴不可更扶淺耕兮病
歲深耕兮石嬰耜登山
兮臨川雉得意兮魚樂
小風兮吹波從其友兮
尾尾日下兮川逝射雉
兮喪余一矢佳人兮潔
齊悵何所兮行媒南山
有葛兮葛有本我羞鋪
兮以君之鉏耒

悲秋

為知命弟作

有美一人兮臨清秋而太息傷天形之缺然兮與有足

者同堂而並席儻嘗獲罪於天兮使而至於斯極夫陰
凝而陽化兮冲氣飪而為和駢拇所以為少枝指所以
為多謂天任汝以道兮曾是形畸而貌獨天厭弃汝兮
脩汝德而謂何中無所考此耿耿兮獨遡風而浩歌歌
曰父耶母耶人乎天乎才之為祥固不若不才之全乎
非天地之私兮又非父母之願也慨伏思而不得兮夢
漂漂而行遠逆真人於軒臺兮請端策而徵衍遇水盈
之坎坎兮得山麓而為蹇雖御良而馬服兮猶往蹇而

來連艮之初六來告休兮艮其趾而無咎如風日之過
河兮人謂守冰而為耗知水性之循環兮曾何損益之
足道蛇百足之狂攘兮夔蹠蹕以行地蛇虺蔓延不自
好兮謂風蓬蓬而無似物憐物之無窮兮目尚為心之
僕隸夫精於形器之表兮視四體百骸其在外予將執
汝手兮游乎浩蕩之會憑天津而濯髮兮攬日月以為
珮嗟不知去來之為我兮天下莫予之為對恐路遠而
多岐兮聊贈汝以指南將雍容於勝日兮嘗試為汝而

妄談

山谷集卷一

欽定四庫全書薈要卷一萬五千一百二十三

集部

山谷集卷二

宋 黃庭堅 撰

古詩五十一首

贈別李次翁

次韻答晁元咎見贈

次韻答張文潛惠寄

同錢志仲飯藉田錢孺文官舍

次韻子瞻贈王定國 次韻張詢齋中春晚

送范德孺知慶州

題王黃州墨跡後

題王仲弓兄弟巽亭

送劉士彥赴福建轉運判官

次韻劉景文登鄴王臺見思五首

柳閱展如蘇子瞻甥也其才德甚美有意於學
故以桃李不言下自成蹊八字作詩贈之

次韻李之純少監惠研

次韻曾子開舍人遊籍田載荷花歸

次韻子瞻題郭熙畫秋山

詠李伯時摹韓幹三馬次蘇子由韻

次韻子瞻和子由觀韓幹馬因論伯時畫天馬
次韻答王春中 奉同子瞻韻寄定國

謝黃從善司業寄惠山泉

次韻錢穆父贈松扇 戲和文潛謝穆父松扇
次韻王炳之惠玉板紙

奉答謝公靜與榮子邕論狄元規孫少述詩長

韻

戲答俞清老道人寒夜三首

奉和文潛贈无咎篇末多見及以既見君子云
胡不喜為韻

子瞻詩句妙一世乃云效庭堅體次韻道之

留王郎

送王郎

古風二首上蘇子瞻

贈別李次翁

四言

利欲薰心隨人翕張國好駿馬盡為王良不有德人俗

無津梁德人天游秋月寒江映徹萬物玲瓏六窓於愛
欲泥如蓮生塘處水超然出泥而香孔竅穿穴明冰其
相維乃根華其本含光大雅次翁用心不忘日問月學
旅人念鄉能如斯蓮汜可小康在俗行李密密堂堂觀
物慈哀涖民愛莊成功萬年付之面牆草衣石質與世
低昂

次韻答晁元咎見贈

補之

翕翕一日炎眈眈萬年永四海仰首觀頌復歸根靜時

雨瀉玉除潢流漲天井性不耐衣冠入門踈造請煮餅
卧北窓保此已微幸空餘見賢心忍渴望梅嶺

次韻答張文潛惠寄

短褐不磷緇文章近楚辭未識想風采別去令人思斯
文已戰勝凱歌偃旂旂君行魚上冰忽復燕哺兒學省
得佳士催來費符移方觀追金玉如許遽言歸南山有
君子握蘭懷令姿但應潔齋俟勿詠無生詩

同錢志仲飯藉田錢孺文官舍

帝籍開千畝農功先九州王孫守耒耜吏隱極風流三
夏豐草木五雲衛郊丘牛羊卧籬落賓客解衣裘汲井
羞燕啜挽溪供甘柔倒靛收蓮的剖蚌煮鴻頭野日草
光合水風荷氣浮稻畦下白鷺林樾應鳴鳩主人發清
賞况復佳同游歸扇障小雨真成一賜休

次韻子瞻贈王定國

鞏

遠志作小草鼃衣生陵屯但為居移氣其實何足言名
下難為人醜好随手翻百年炊未熟一垤蟻追奔夏日

蓬山永戎葵茂牆藩王子吐佳句如蠶絲出盆風姿極
灑落雲氣畫壘構屬有補袞章日當寵頻煩鄙夫無他
能上車問寒溫唯思窮山去抱犢長兒孫

次韻張詢齋中春晚

學古編簡殘懷人江湖永非無車馬客心遠境亦靜挽
疏夜雨畦煮茗寒泉井春去不窺園黃鸝頗三請立朝
無物望補外儻天幸想乘滄浪船濯髮晞翠嶺

補外一作得邑

又石本作得邦

送范德孺知慶州

純粹

乃翁知國如知兵塞垣草木識威名敵人開戶玩處女
掩耳不及驚雷霆平生端有活國計百不一試羶九京
阿兄兩持慶州節十年麒麟地上行潭潭大度如卧虎
邊人耕桑長兒女折衝千里雖有餘論道經邦政要渠
妙年出補父兄處公自才力應時須春風旂旂擁萬夫
幕下諸將思草枯智名勇功不入眼可用折箠笞羌胡

題王黃州墨跡後

掘地與斷木智不如機舂聖人懷餘巧故為萬物宗世
有斲泥手或不待郢工往時王黃州謀國極匪躬朝聞
不及夕百士避其鋒九鼎安盤石一身轉秋蓬浮雲當
日月白髮照秋空諸君發蒙耳汲直與臣同

題王仲弓兄弟巽亭

寔

大隗七聖迷許由連城重里中多佳樹與世作梁棟市
門行清渠渠水可抱甕輦飛城東南隱几撫羣動人境
要俱爾我乃得大用烏衣之雲孫昆弟不好弄木末風

雨來卷箔醉賓從事常超然觀樂與賢者共人登斷壠
求我自歸鴻送溪毛亂錦頽候蟲響機綜世紛甚崢嶸
胸次欲空洞讀書開萬卷謀國妙百中儻無斲鼻工聊
付曲肱夢

送劉士彥赴福建轉運判官

秋葉雨墮來冥鴻天資高車馬氣成霧九衢行滔滔中
有寂寞人靈府局鑰牢西風持漢節騎從嚴弓刀維閩
七聚落惇獨困吏饕土弊禾黍惡水煩鱗介勞南驅將

仁氣百城共一陶察人極涇渭問俗及豚羔官閒得勝
日杖屨之林臯人間閱忠厚物外訪英豪

次韻劉景文登鄴王臺見思五首

季孫

黃濁歸大壑漣漪遶重城西風一橫笛金氣與高明歸
鴉度晚景落雁帶邊聲平生知音處別離空復情

舊時劉子政憔悴鄴王城把筆已頭白見書猶眼明平
原秋樹色沙麓暮鐘聲歸雁南飛盡無因寄此情

繫匏兩相憶極目十餘城積潦干斗極山河皆夜明白

壁按劍起朱弦流水聲垂逢四時爾木石了無情

茗花浮曾坑酒泛酌宜城路尋西九曲人似漢三明千
戶非無相五言空有聲何時郭池晚照影寫閒情

公詩如美色未嫁已傾城嫁作蕩子婦寒機泣到明綠
琴蛛網遍絃絕不成聲想見鷗夷子江湖萬里情

柳閱展如蘇子瞻甥也其才德甚美有意於學故
以桃李不言下自成蹊八字作詩贈之

柳君文甚武

甚武一
作武甚

睥視萬人豪

睥視一
作睥睨

老氣鼓不作

卷旗解弓刀上為朝陽桐下為澗溪毛囊中有美實期
子種蟠桃

浮陽愧嘉魚道傍多苦李古來賢達人不爭咸陽市吾
子富春秋日月東趨一作逝水潛聖有玉音聞道而已矣

霜威能折綿風力欲冰酒勤子來訪道枵然我何有寢
興與時俱由我屈伸肘飯羹自知味如此是道不
任世萬鈞重載言以為軒空文誤來世聖達欲無言咸
池浴日月深宅養靈根胸中浩然氣一家同化元

陸沉百世師寄食魯柳下我今見諸孫風味窺大雅大雅久不作圖王勿成霸偉哉居移氣蘭鮑在所化

聖學魯東家恭惟同出自乘流去本遠遂有作書肆日中駕肩來薄晚常掉臂徒囂終無羸歸矣求已事

清潤玉泉冰高明秋景晴妙年勤翰墨銀鈎爛縱橫藍田生美璞未琢價連城思為萬乘器柱下貴晚成

八方去求道渺渺困多蹊歸來坐虛室夕陽在吾西君今秣高馬夙駕先鳴鷄慎勿取我語親行乃不迷

次韻李之純少監惠硯周

黃公山下黃鷄秋持節卹刑曾少休
小人負弩得開道掃葉張飲林巖幽
相傳有石非地產列仙持來自羅浮
酒酣步出雲雨上南撫方城西嵩丘
林端乃見石空洞猛獸戛鼻踞上頭
鳥道兔迹謀挽致萬牛不動六丁愁
道家蓬萊見仙伯我亦洗湔與清流
探囊贈研頗宜墨近出黃山非遠求
乃知此山自才美物欲致用當窮搜
迷邦故令成器晚不琢元非匠石羞

次韻曾子開舍人游籍田載荷花歸

肇

維王調玉燭時夏雨我田壁挂蒼龍骨溜渠故濺濺三
推勸根本百穀收阜堅官司極齋明崇丘見升煙繫馬
西門柳憶聽去夏蟬剥芡珠走盤鉤魚柳貫鮮掃堂延
枕簟公子氣翩翩自爾欲繼往阻心如壅泉紫微樂暇
日披襟詠風漣紅粧倚荷蓋水鏡寫明蠲美物亦有實
翦房助加籩珠宮紫貝闕足此水府仙鬱鬱冠蓋宅追
犇易彫年能從物外賞真是區中賢仍聞載後乘籠燭

照嬋娟

次韻子瞻題郭熙畫秋山

黃州逐客未賜環江南江北飽看山
玉堂卧對郭熙畫發興已在青林間
郭熙官畫但荒遠短紙曲折開秋晚
江村煙外雨脚明歸鴈行邊餘疊巘
坐思黃甘洞庭霜恨身不如鴈隨陽
熙今頭白有眼力尚能弄筆映窓光
畫取江南好風日慰此將老鏡中髮
但熙肯畫寬作程五日十日一水石

詠李伯時摹韓幹三馬次蘇子由韻簡伯時兼寄

李德素

公麟
染

太史瑣窓雲雨垂試開三馬拂蛛絲李侯寫影韓幹墨
自有筆如沙畫錐絕塵超日精爽緊若失其一望路馳
馬官不語臂指揮乃知仗下非新羈吾嘗覽觀在垧馬
駑駘成列無權奇緬懷胡沙英妙質一雄可將十萬雌
決非廝養所成就天驥生駒人得之千金市骨今何有
士或不價五殺皮李侯畫隱百寮底初不自期人誤知

戲弄丹青聊卒歲身如閱世老禪師

次韻子瞻和子由觀韓幹馬因論伯時畫天馬

于闐花驄龍八尺看雲不受絡頭絲西河驄作蒲萄錦
雙瞳夾鏡耳卓錫長楸落日試天步知有四極無由馳
電行山立氣深穩可耐珠韉白玉羈李侯一顧歎絕足
領略古法生新奇一日真龍入圖畫在垠群雄望風雌
曹霸弟子沙苑丞喜作肥馬人笑之李侯論幹獨不爾
妙盡骨相遺毛皮翰林評書乃如此賤肥貴瘦渠未知

况我平生賞神俊僧中云是道林師

俊一作駿

次韻答王春中寅

有身猶縛律無夢到行雲俗裏光塵合胷中涇渭分我
寒江南秀一見空馬羣夸士慕鍾鼎寒儒守典墳吾欲
超萬古乃如負山蚊能來商略此趺坐對鑪芬

奉同子瞻韻寄定國

風雲開古鏡淮海熨冰紈王孫醉短舞羅襪步微瀾老
驥心雖在白鷗盟已寒斯人氣金玉視世一鼠肝南歸

脫蟲蠱入對隨孔鸞忍以口語去鼓船下驚湍收身薄
冰釋置枕泰山安后土花藥麗海門天水寬伐木思我
友知人良獨難遙憐鬚鬢綠猶復耐悲歡

謝黃從善司業寄惠山泉

錫谷寒泉槌石俱并得新詩蠶尾書急呼烹鼎供茗事
晴江急雨看跳珠是功與世滌羶腴令我屢空常晏如
安得左轡清潁尾風鑪煮茗卧西湖

次韻錢穆父贈松扇

細

銀鈎玉唾明蠟紙松筵輕涼并送似可憐遠度幘溝瀆
適堪今時襴襪子丈人玉立氣高寒三韓持節見神山
應得安期不死草使我蟬蛻塵埃間

戲和文潛謝穆父松扇

猩毛束筆魚網紙松枅織扇清相似動搖懷袖風雨來
想見僧前落松子張侯哦詩松韻寒六月火雲蒸肉山
持贈小君聊一笑不須射雉殼黃間

次韻王炳之惠玉板紙

伯虎

王侯須若緣坡竹哦詩清風起空谷古田小牋惠我百
信知溪翁能解玉鳴礪千杵動秋山裹糧萬里來輦轂
儒林丈人有蘇公相如子雲再生蜀徃時翰墨頗橫流
此公歸來有邊幅小楷多傳樂毅論高詞欲奏雲門曲
不持歸掃蘇公門乃令小人今拜辱去騷甚遠文氣卑
畫虎不成書勢俗董狐南史一筆無誤掌殺青司記錄
雖然此中有公議或辱五鼎榮半菽願公進德使見書
不敢求君米千斛

奉答謝公靜與榮子邕論狄元規孫少述詩長韻

謝公遂如此宰木已三霜無人知句法秋月自澄江二
子學邁俗窺杜見牖窓試斲郢人鼻未免傷手創蟹胥
與竹萌乃不美羊腔自往見謝公論詩得濠梁世方尊
兩耳未敢葉受降丹穴鳳凰羽風林虎豹章小謝有家
法聞此不聽將相思北風惡歸鴈落斜行

戲答俞清老道人寒夜三首

索索葉自雨月寒遙夜闌馬嘶車鐸鳴羣動不遑安有

人夢超俗去髮脫儒冠平明視清鏡政爾良獨難

聞道一稊米出身縛簪纓懷我伐木友寒衾夢丁丁富貴但如此百年半曲肱早晚相隨去松根有茯苓

牧羊金華山早通玉帝籍至今風低草氾氾見白石金華風煙下亦有君履跡何為紅塵裡頷鬚欲雪白

奉和文潛贈无咎篇末多見及以既見君子云胡不喜為韻

龜以靈故焦雉以文故翳本心如日月利欲食之既後

生玩華蔭照影終沒世安得八紘置以道獵衆智

談經用燕說束棄諸儒傳濫觴雖有罪末派瀰九縣張
侯真理窟堅壁勿與戰難以口舌爭水清石自見

野性友麋鹿君非我同羣文明近日月我亦不如君十
載長相望逝川水沄沄何當談絕倒茗椀對鑪薰

北寺鎖齋房陳鑰時一啟晁張楚然來連壁照書几庭
柏鬱葱葱紅榴罇多子時蒙吐佳句幽處萬籟起

先皇元豐末極厭士淺聞只今舉秀孝天未喪斯文晁

張班馬首崔蔡不足云當令橫筆陣一戰靜楚氛

張侯窘炊玉僦屋得空壚但見索酒郎不見酒家胡雖
肥如瓠壺胸中殊不匱何用知如此文采似於菟

荆公六藝學妙處端不朽諸生用其短頗復鑿戶牖譬
如學捧心初不悟己醜玉石恐俱焚公為區別不

吾友陳師道抱獨門掃軌晁張作薦書射雉用一矢吾
聞舉逸民故得天下喜兩公陣堂堂此士可摩壘

子瞻詩句妙一世乃云效庭堅體蓋退之戲效孟

郊樊宗師之比以文滑稽耳恐後生不解故以
韻道之

我詩如曹鄴淺陋不成邦公如大國楚吞五湖三江赤
壁風月笛玉堂雲霧窓句法提一律堅城受我降枯松
倒澗壑波濤所春撞萬牛挽不前公乃獨力扛諸人方
嗤黠渠非晁張雙但懷相識察牀下拜老龐小兒未可
知客或許敦龐誠堪壻阿巽買紅纒酒缸

留王郎

純亮
世弼

河外吹沙塵江南水無津骨肉常萬里寄聲何由頻我
隨簡書來顧影將一身留我左右手奉承白頭親小邦
王事略蟲鳥聲無人王甥解鞍馬夜語雞喚晨母慈家
人肥女慧男垂紳有田為酒事豚韭及秋春生涯得如
此舊學更光新索去何草草少留慰艱勤百年才一炊
六籍經幾秦要知胸中有不與跡同陳郢人懷妙質聊
欲運吾斤

白頭一作白髮

送王郎

酌君以蒲城桑落之酒泛君以湘纍秋菊之英贈君以
黔川點漆之墨送君以陽關墮淚之聲酒澆胸中之磊
塊菊制短世之頽齡墨以傳千古文章之印歌以寫一
家兄弟之情江山萬里頭俱白骨肉十年眼終青連牀
夜語雞戒曉書囊無底談未了有功翰墨乃如此何恨
遠別音書少炊沙作糜終不飽鏤冰文章費工巧要須
心地收汗馬孔孟行世日杲杲有弟有弟力持家婦能
養姑供珍鮭兒大詩書女絲一作桑麻公但讀書煮春茶

古風二首上蘇子瞻

江梅有佳實託根桃李場桃李終不言朝朝借恩光孤
芳忌皎潔冰雪空自香古來和鼎實此物升廟廊歲月
坐成晚煙雨青已黃得升桃李盤以遠初見嘗終然不
可口擲置官道傍但使本根在棄捐果何傷

青松出澗壑十里聞風聲上有百尺絲下有千歲苓自
性得要久為人制頽齡小草有遠志相依在平生醫和
不並世深根且固蒂人言可醫國何用太早計小大才

則殊氣味固相似

山谷集卷二

欽定四庫全書薈要卷一萬五千一百二十四

集部

山谷集卷三

宋 黃庭堅 撰

古詩五十首

贛上食蓮有感

贈鄭郊

寄裴仲謨

送鄭彥能宣德知福昌縣

顯聖寺庭枸杞

平陰張澄居士隱處三詩

雙井茶送子瞻

和答子瞻

子瞻以子夏丘明見戲聊復戲答

省中烹茶懷子瞻用前韻

以雙井茶送孔常父

常父答詩有煎點徑須煩綠珠之句復次韻戲

答

戲呈孔毅父

以團茶洮州綠石研贈无咎文潜

晁張和答秦觀五言予亦次韻

常父惠示丁卯雪十四韻謹同韻賦之

次韻答曹子方雜言

和答子瞻和子由常父憶館中故事詩

謝公定和二范秋懷五首邀予同作

謝送礪賜壑源揀牙

以小團龍及半挺贈无咎并詩用前韻為戲

次韻子由續溪病起被召寄王定國

秘書省冬夜宿直寄懷李德素

次韻答邢惇夫

次韻張仲謀過酺池寺齋

送謝公定作竟陵主簿

贈送張叔和

次韻秦觀過陳無已書院觀鄙句之作

次韻子瞻送顧子敦河北都運二首

餞子敦席上奉同孔經父八韻

次韻寄晁以道

次以道韻寄范子夷子默

僧景宗相訪寄法王航禪師

送李德素歸舒城

謝王仲至惠洮州礪石黃玉印材

題松下淵明

次韻子瞻詠好頭赤圖

詠伯時虎脊天馬圖

詠伯時象龍圖

題竹石牧牛

觀伯時畫馬

記夢

賴上食蓮有感

蓮實大如指分甘念母慈共房頭齷齪更深兄弟思
實中有么荷拳如小兒手令我憶衆雛迎門索梨棗蓮心
政自苦食苦何能甘甘飡恐腊毒素素食則懷慙蓮生淤
泥中不與泥同調食蓮誰不甘知味良獨少吾家雙井
塘十里秋風香安得同懷子歸製芙蓉裳

贈鄭郊

高居大士是龍象草堂丈人非熊羆不逢壞衲乞香飯

唯見白頭垂釣絲
鴛鴦終日愛水鏡
菡萏晚風凋舞衣
開徑老禪來煮茗
還尋密竹逕中歸

寄裴仲謨

綸

交游二十年義等親
骨肉風雨漂我巢
公亦未有屋寄聲
來問安足音到空
谷我家輦轂下薪
桂炊白玉在官與
影俱衣綻髮曲局
天機行日月春事
勤草木念公篤行
李野飯中道宿驚
沙卷旂烏尾訛城
角騷騷家治具夫
子且歸沐作書寄
後乘為我遣臣僕
起居太夫人

并問相與睦

烏尾訛城角一本作烏尾城角謬謬音縮

送鄭彥能宣德知福昌縣僅

往時河北盜橫行白晝驅人取

一作入

城郭惟聞不犯鄭

冠氏犬卧不驚民氣樂祇今化兵作鋤耰田舍老翁百
不憂銅章去作福昌縣山中讀書民有秋福昌愛民如
父母當官不擾萬事舉用才之地要得人眼中虛席十
四五不知諸公用心許魯恭卓茂可人否

顯聖寺庭枸杞

仙苗壽日月佛界承露雨誰為萬年計乞此一坏土扶
踈上翠蓋磊落綴丹乳去家尚不食出家何用許政恐
落人間采剥四時苦養成九節杖持獻西王母

平陰張澄居士隱處三詩

仁亭

無心經世網有道藏丘山養生息天黥藝木印歲寒德
人牆九仞強學窺一班張侯大雅質結髮闖儒關跼羸
或諧偶老大嘗難難築亭上雲雨日月轉朱欄牀敷聽

萬籟我家頗寬閒
牧牛有坦塗
亡羊自多端
市聲塵午
枕常以此心觀

復庵

春糧出求人行李
彌宇宙
久客渺愁人
馬飢僕夫瘦
歸來一丘中
萬事不改舊
禾黍鋤其驕
牛羊鞭其後
隱几天籟寒
六鑿忽通透

亭泉

水德通萬物
發源會時亨
伏坎非心願
成川且意行
棲

遲林丘下欲濯無塵纓杖藜逢載酒一瓢酌餘清

雙井茶送子瞻

人間風日不到處天上玉堂森寶書想見東坡舊居士
揮毫百斛瀉明珠我家江南摘雲腴落磴霏霏雪不如
為公喚起黃州夢獨載扁舟向五湖

和答子瞻

一月空回長者車報人問疾遣兒書翰林貽我東南句
窓間默坐得玄珠故園溪友膾腹腴遠色春茗問何如

玉堂下直長廊靜為君滿意說江湖

子瞻以子夏丘明見戲聊復戲答

化工見彈大早計端為失明能著書邇來似天會事發
淚睫見光猶墮珠喜公新賜紫琳腴上清虛皇對久如
請天還我讀書眼願載軒轅訖鼎湖

省中烹茶懷子瞻用前韻

閣門井不落第二竟陵谷簾定誤書思公煮茗共湯鼎
蚯蚓竅生魚眼珠置身九州之上腴爭名燄中沃焚如

但恐次山胷磊塊終便

平聲酒舫石魚湖元次山石魚湖歌曰石魚湖似

洞庭夏水欲滿君山青疾風三日作大浪不能廢人運酒舫

以雙井茶送孔常父

武仲

校經同省並門居無日不聞公讀書故持茗椀澆舌本
要聽六經如貫珠心知韻勝舌知腴何似寶雲與真如
湯餅作魔應午寢慰公渴夢吞江湖

常父答詩有煎點徑湏煩綠珠之句復次韻戲答
小鬟雖醜巧粧梳掃地如鏡能檢書欲買娉婷供煮茗

我無一斛明月珠知公家亦闕掃除但有文君對相如
政當為公乞如願作牋遠寄宮亭湖

牋一作書

戲呈孔毅父

平仲

管城子無食肉相孔方兄有絕交書文章功用不經世
何異絲窠綴露珠校書著作頻詔除猶能上車問何如
忽憶僧床同野飯夢隨秋鴈到東湖

以團茶洮州綠石研贈无咎文潜

晁子智囊可以括四海張子筆端可以回萬牛自我得

二士意氣傾九州道山延閣委竹帛清都太微望冕旒
貝宮胎寒弄明月天網下罩一日收此地要湏無不有
紫皇訪問富春秋晁無咎贈君越侯所貢蒼玉璧可烹
玉塵試春色澆君胸中過秦論斟酌古今來活國張文
潛贈君洮州綠石含風漪能淬筆鋒利如錐請書元祐
開皇極第八思齊訪落詩

晁張和答秦觀五言予亦次韻

山林與心違日月使鬢換儒衣相詬病文字奉娛玩自

古非一秦六籍蓋多難詩書或發冢熟念令人惋秦君
銳本學驥子已血汗相期驂天衢伯樂嘗一盼士為欲
心縛寸勇輒尺懦要當觀此心日照雲霧散扶踈萬物
影宇宙同璀璨置規豈惟君亦自警弛慢

常父惠示丁卯雪十四韻謹同韻賦之

春皇賦上瑞來寧黃屋憂下令走百神大雲庇九丘風
聲將仁氣艷艷生瓦溝寒花舞零亂表裏照皇州千門
委圭璧曉日不肯收元年冬無澤穴處長螟螽兩宮初

肝食補袞獻良壽有道四夷守無征萬邦休耆年秉國
論涇渭極分流輟耒入班品逸民盡歸周股肱共一體
間不容戈矛人材如金玉同美異剛柔政湏衆賢和乃
可踈共啖改弦張敝法病十九已瘳王指要不匿蝕非
日月羞桑林請六事河水問九疇天意果然得玄功與
吾謀此物有嘉德占年在麥秋近臣知天喜玉色動冕
旒儒館無他事作詩配崇丘

次韻答曹子方雜言

輔

憂鵬入歸來杞國痛天摧玉堂却對鄧公直北門喚仗
聽風雷山川悠遠莫浪許富貴崢嶸今鼎來萬壑松聲
如在耳意不及此文生哀

和答子瞻和子由常父憶館中故事詩

二蘇上連壁三孔立分鼎少小看飛騰中年嗟遠屏風
撼鵲鷁枝波寒鴻雁影天不祿斯文俱來集臺省日月
黃道明桃李清晝永時平少犴獄地禁絕鼃黽頗懷脩
故事文會陳果茗當時羣玉府人物殊秀整下直馬闥

闌杯盤具俄頃共醉凌波襪誰窺投轄井天網極恢疎
道山非簿領何曾歸閉門燈火坐閒冷欲觀太平象復
古望公等賤子託後車當煩煮湯餅

謝公定和二范秋懷五首邀予同作

惛

西風一葉脫迹已不可掃卷有白馬生朝回焚諫草誰
云事君難是亦父子間所要功補袞不言能犯顏
四會有黃令學古著勲多白頭對紅葉奈此搖落何雖
懷斲鼻巧有斧且無柯安得五十絃奏此寒士歌

采蓮涉江湖采菊度林藪
揄鬢不成妍誰憐飛蓬首
平生耦耕地風雨深稂莠
謝公遂如此永袖絕絃手

往日孫陽翟才可任遺補
擊強如摧枯食蘖不知苦
屬者缺諫垣時論或未許
儻可假一邦使民作鄒魯

用智常恨耄用決常恨早
推轂天下士誠心要傾倒
海宇日清明廟堂勤灑掃
何為陳師道白髮三徑草

謝送礪賜壑源揀牙

喬雲從龍小蒼壁元豐至今人未識
壑源包貢第一春

緇匱碾香供玉食睿思殿東金井欄甘露薦椀天開顏

橋山事嚴庀百局補袞諸公省中宿中人傳賜夜未央

雨露恩光照宮燭左丞似是李元禮好事風流有涇渭

肯憐天祿校書郎親敕家庭遣分似春風飽識大官羊

不慣腐儒湯餅腸搜攪十年燈火讀令我胃中書傳香

已戒應門老馬走客來問字莫載酒

補袞一作袞司

以小團龍及半挺贈无咎并詩用前韻為戲

我持玄圭與蒼壁以暗投人渠不識城南窮巷有佳人

不索賓郎常晏食赤銅茗椀雨斑斑銀粟翻光鮮破顏
上有龍文下碁局擔囊贈君諾已宿此物已是元豐春
先皇聖功調玉燭晁子胷中開典禮平生自期莘與渭
故用澆君磊塊胷莫令鬢毛雪相似曲几蒲團聽煮湯
煎成車聲繞羊腸鷄蘇胡麻留渴羌不應亂我官焙香
肥如瓠壺鼻雷吼幸君飲此勿飲酒

擔囊一本
作探囊

次韻子由績溪病起被召寄王定國

種萱盈九畹蘇子憂國病炎蒸卧百戰山立有餘勁斯

人廊廟器不合從遠屏江湖搖歸心白髮侵老境艱難
喜歸來如晴月生嶺仍懷阻歸舟風水蛟鱷橫補袞諫
官能用儒吾道盛上書詆平津蠹葉初記省至今民社
計非事頰舌競方來立本朝獻納繼晨暝人材包新舊
王度濟寬猛必開曲突謀滿慰傾耳聽斯文呂與張泉
下亦蘇醒天聰四門闢國勢九鼎定身得遭太平分甘
守閒冷天津十年面想見頎而整何時及國門休暇過
煮茗燒燈留夜語鴻鴈看對影但恐張羅地頗復多造

請維此禮部公寒泉甃舊井謫去久羸瓶召還汲脩綆
太任決齋宮陛下天統慶日月進亨衢經緯寒耿耿西
走已和我南遷無哀郢誰言兩逐臣朝轡天街並王子竄
炎洲萬死保軀命還家類故紅信亦抱淵靜稅屋待車
音掃門親帚柄行當懷書傳載酒求是正端如嘗橄欖
苦過味方永

秘書省冬夜宿直寄李德素

曲肱驚夢寒皎皎入牖下出門問何祥岑寂省中夜姮

娥携青女一笑粲萬瓦懷我金玉人幽獨秉大雅古來
絕朱絃蓋為知音者同牀有不察而況子在野獨立占
少微長懷何由寫

次韻答邢惇夫

居實

為山不能山過在一簣止渥洼騏驎兒墮地志千里岷
江初濫觴入楚乃無底將升聖人堂道固有廉陛邢子
好少年如世有源水方求無津涯不作蛙井喜兒中兀
老蒼趣造甚奇異過閱王公門袖中有漫刺別來阻河

山望遠每障袂斯文向千載有志常寡遂後生文楚楚
照影若孔翠不應太玄草晞價咸陽市雨作枕簟秋官
閒省中睡夢不到漢東茗椀乃為崇聞君肺渴減頗復
佳食寐讀書得新功來鴈寄一字

奇異一
作奇偉

次韻張仲謀過酺池寺齋

詢

十年醉錦幄醺醺照金沙歌眠春風底不去留君家是
時應門兒紫蘭茁其芽只今將弟妹嬉戲牽羊車忽書
滿窓紙整整復斜斜平生悲歡事頭緒如亂麻苟祿無

補報幾成來食嗟喜君崇名節青雲似可涯我夢江湖
去釣船刺蘆花江濱開園宅畦蔗蒔梨柎夢驚如昨日
炊玉困京華公來或藜羹愛我不疵瑕深念煩鄉里忍
窮禁貸賒夜談簾幕冷霜月動金蛇即是桃李月春蟲
語交加我亦無酒飲一室可盤媧要公共文字朱墨勘
舛差非復少年日聲名取孀嫠諸阮有二妙能詩定自
嘉何時來煮餅蟹眼試官茶

送謝公定作竟陵主簿

謝公文章如虎豹至今斑斑在兒孫竟陵主簿極多聞
萬事不理專討論澗松無心古湏鬣天球不琢中粹溫
落筆塵沙百馬奔劇談風霆九河翻胸中恢疎無怨恩
當官持廉且不煩吏民欺公亦可忍慎勿驚魚使水渾
漢濱耆舊今誰存駟馬高蓋徒紛紛安知四海習鑿齒
拄笏看度南山雲

贈送張叔和頃

張侯溫如鄒子律能令陰谷黍生春有齊先君之季女

十年擇對無可人箕帚掃公堂上塵家風孝友故相親
廟中時薦南澗蘋兒女衣袴得補紉兩家俱為白頭計
察公與人意甚真吏能束縛老姦手要使鰥寡無顰呻
但送此光還照己平生倦學皆日新我提養生之四印
君家所有更贈君百戰百勝不如一忍萬言萬當不如
一默無可簡擇眼界平不藏秋毫心地直我肱三折得
此醫自覺兩踵生光輝團蒲日靜烏吟時鑪薰一炷試

觀之

日靜一作風靜

次韻秦觀過陳無已書院觀鄙句之作

師道

陳侯大雅姿四壁不治第碌碌盆盎中見此古壘洗薄
飯不能羹牆陰老春薺惟有文字性萬古抱根柢我學
少師承坎井可窺底何因蒙賞味相享當牲醴試問求
志君文章自有體玄鑰鎖靈臺渠當為公啟

惟
有文字
性一作文

工字

次韻子瞻送顧子敦河北都運二首

臨

儒者給事中顧公甚魁偉經明往行河商畧頗應史勞

人又費乏國計安能已成功渠有命得人斯可喜似聞
阻飢餘惡少驚邑里啟鑰探珠金奪懷取姝美部中十
盜發一二書奏紙西連魏三河東盡齊四履此豈小事
哉何但行治水使民皆農桑乃見真儒耳

今代顧虎頭骨相自雄偉不令長天官亦合丞御史能
貧安四壁無愠可三已昨來立清班國士相顧喜何因
將使節風日按千里汲黯不居中似非朝廷美大任錄
萬事御坐留諫紙發政恐傷民天步薄冰履蒼生憂其

魚南畝多被水公行圖安集信目勿信耳

餞子敦席上奉同孔經父八韻

文仲

日永知槐夏雲黃喜麥秋同朝國士集賜沐吏功休祇
園冠蓋地清與耳目謀晴雲浮茗椀飛電落文楸一客
衆主人醉此顧虎頭虎頭持龍節排河使東流厥田惟
上上桑麻十數州計功不汗馬可致萬戶侯

龍節一作漢節

次韻寄晁以道

說之

河漢牛與女咫尺不得語歡然共秋盤以茲不忘故我

友在天末問天許見否雲雨隔九關日月不我與念公
坐臞禪守心如縛虎頗思携法喜舉案饁南畝不聞犯
齋收猶聞畫眉詗良為鼻祖來渠伊為伴侶我有桂溪
刀聊憑東風去

次以道韻寄范子夷子默

正平
正思

鼓缶多秦聲琵琶作胡語是中非神奇根器如此故范
公秉文德斷國極可否至今莞樞機大度而少與蟬媽
世有人風壑嘯兩虎小心學忠孝鄙事能壠畝持論不

遽篠奉身謝誇詡頗知城南園文會英俊侶何當休沐
歸懷茗就煎去

僧景宗相訪寄法王航禪師

抱牘稍退鳧驚行倦禪時作橐駝坐忽憶頭陀雲外人
閉門作夏與僧過一絲不掛魚脫淵萬古同歸蟻旋磨
山中雨熟瓜芋田喚取小僧休乞錢

送李德素歸舒城

僧夏莫問塗麥秋宜煮餅北寺旬休歸長廊六月冷簟

翻寒江浪茶破蒼壁影李侯為我來遮以歸期請青衿
廢詩書白髮違定省荒畦當鉏灌蠹簡要籤整挽衣不
可留決去事幽屏天恢獵德網日饒養賢鼎此士落江
湖熟思令人瘦胷中吉祥宅膜外榮辱境婆婆萬物表
藏及避肯縈人生要當學安燕不徹警古來惟深地相
待汲脩綆

謝王仲至惠洮州礪石黃玉印材

欽臣

洮礪發劒虹貫日印章不琢色蒸栗磨礪頑鈍印此心

佳人持贈意堅密佳人鬢彫文字工藏書萬卷曾次同
日臨天閑泰真龍新詩得意挾雷風我貧無句當二物
看公倒海取明月

題松下淵明

南渡誠草草長沙想艱難松風自度曲我琴不須彈遠
公香火社遺民文字禪雖非老翁事幽尚亦可觀客來
欲開說觴至不得言

開一作問

次韻子瞻詠好頭赤圖

李侯畫骨不畫肉筆下馬生如破竹秦駒雖入天仗圖
猶恐真龍在空谷精神權奇汗溝赤有頭赤烏能逐日
安得身為漢都護三十六城看歷歷不畫肉一作亦畫
肉天仗一作天馬
有頭赤烏一
作自有赤烏

詠伯時虎脊天馬圖

筆端那有此千里在胷中四蹄雷電去一顧馬羣空誰
能乘此物超俗駕長風逸材歸轡勒歲在執徐同雷電
一作

雷電

詠伯時象龍圖

上黨良家子挽強如屈肘三十學春秋豈為莎車首誰
言馮光祿不如甘延壽雖無千戶封乃得六龍友

題竹石牧牛

野次小崢嶸幽篁相依綠阿童三尺箠御此老叢棘石
吾甚愛之勿遣牛礪角牛礪角尚可牛鬪殘我竹

觀伯時畫馬

儀鸞供帳饗蟲行翰林濕薪爆竹聲風簾官燭淚縱橫

木穿石罅未渠透坐窓不遨令人瘦貧馬百竇逢一豆
眼明見此五花驄徑思著鞭隨詩翁城西野桃尋小紅
記夢

衆真絕妙擁靈君曉然夢之非紛紜窓中遠山是眉黛
席上榴花皆舞裙借問琵琶得聞否靈君色莊妓揺手
兩客爭棋爛斧柯一兒壞局君不呵杏梁歸燕空語多
奈此雲窓霧閣何

山谷集卷三

謹案卷一第六頁後五行烹鼠肝而腹果然刊本

腹訛復今改


第八頁後五行彼覆却萬方刊本脫于字據別本
增

卷二第十五頁前七行客或許敦厖刊本厖訛龐
按左傳民生敦厖詩本此今據改

卷三第六頁前五行獨載扁舟向五湖刊本舟訛
州據宋詩鈔改

第十七頁後一行何當休沐歸刊本沐訛休今改





總校官庶吉士臣張能照

校對官中書臣張九鐔

謄錄監生臣龍翔